

RITUALE ROMANUM ANNO DOMINI MCMLII

Benedictio vini

in Festo S. Joannis Apostoli et Evangelistae

In Festo sancti Joannis Ap. et Evang., expleta omnino Missa majore, hoc est post ultimum Evangelium, Sacerdos, retentis omnibus paramentis, excepto manipulo, vinum a populo oblatum, in memoriam et honorem S. Joannis, qui venenum innocue sumpsit, benedicit hoc modo :

V/. Adjutorium nostrum in nomine Domini.

R/. Qui fecit caelum et terram.

V/. Dominus vobiscum.

R/. Et cum spiritu tuo.

Oremus.

Oratio

Bene + dicere et conse + crare digneris, Domine Deus, dextera tua hunc calicem vini, et cujuslibet potus: et praesta; ut per merita sancti Joannis Apostoli et Evangelistae, omnes in te credentes et de calice isto bibentes benedicantur, et protegantur. Et sicut beatus Joannes de calice bibens venenum, illaesus omnino permansit, ita omnes, hac die in honorem beati Joannis de calice isto bibentes, meritis ipsius ab omni aegritudine veneni et noxiis quibusvis absolvantur, et corpore ac anima se offerentes, ab omni culpa liberentur. Per Christum Dominum nostrum. **R/. Amen.**

Bene + dic, Domine, hanc creaturam potus: ut sit remedium salutare omnibus sumentibus : et praesta per

invocationem sancti nominis tui; ut, quicumque ex eo gustaverint, tam animae quam corporis sanitatem, te donante, percipiant. Per Christum Dominum nostrum.

R/. Amen.

Et benedictio Dei omnipotentis, Patris, et Filii, + et Spiritus Sancti, descendat super hanc creaturam vini, et cujuslibet potus, et maneat semper. **R/. Amen.**

Et aspergatur aqua Benedicta.

¶ **Quod si benedictio illa fiat privatim extra Missam, Sacerdos, superpelliceo et stola coloris albi indutus, eam conficiat modo superius tradito.**

Alia Benedictio vini

in Festo S. Joannis Apostoli et Evangelistae

In fine Missae post Evangelium sancti Joannis, In principio erat Verbum, dicitur :

Psalmus 22

Dominus pascit me : nihil mihi deest; * in pascuis virentibus cubare me facit. Ad aquas, ubi quiescam, conducit me; * reficit animam meam.

Deducit me per semitas rectas * propter nomen suum.

Etsi incedam in valle tenebrosa, * non timebo mala, quia tu mecum es.

Virga tua et baculus tuus : * haec me consolantur. —

Paras mihi mensam * spectantibus adversariis meis;

Inungis oleo caput meum; * calix meus uberrimus est.

Benignitas et gratia me sequentur * cunctis diebus vitae meae,

Et habitabo in domo Domini * in longissima tempora.

Gloria Patri.

Kyrie, eleison. Christe, eleison. Kyrie, eleison.

Pater noster **secreto usque ad**

V/. Et ne nos inducas in tentationem.

R/. Sed libera nos a malo.

V/. Salvos fac servos tuos.

R/. Deus meus, sperantes in te.

V/. Mitte eis, Domine, auxilium de sancto.

R/. Et de Sion tuere eos.

V/. Nihil proficiat inimicus in eis.

R/. Et filius iniquitatis non apponat nocere eis.

V/. Et si mortiferum quid biberint,

R/. Non eis nocebit.

V/. Domine, exaudi orationem meam.

R/. Et clamor meus ad te veniat.

V/. Dominus vobiscum.

R/. Et cum spiritu tuo.

Oremus.

Oratio

Domine sancte, Pater omnipotens, aeterne Deus: qui Filium tuum tibi coaeternum et consubstantialem de caelis descendere, et de sacratissima Virgine Maria in hoc tempore plenitudinis incarnari temporaliter voluisti, ut ovem perditam et errantem quaereret, et in humeris propriis ad ovile reportaret; nec non ut eum, qui in latrones incidit, a vulnerum suorum dolore, infundens ipsi vinum et oleum, curaret; bene + dic et sancti + fica hoc vinum : quod de vite in potum hominum produxisti, et

praesta : ut, quisquis in hac sacra solemnitate de eo sumpserit vel biberit, salutem animae et corporis consequatur : et si in peregrinatione fuerit, ab eodem, tua gratia mediante, confortetur; ut via ejus in omni prosperitate dirigatur. Per eundem Christum Dominum nostrum. **R/. Amen.**

Oremus. **Oratio**

Domine Jesu Christe, qui te vitem veram, et sanctos Apostolos tuos palmites appellari, et de omnibus te diligentibus vineam electam plantare voluisti; bene + dic hoc vinum, et virtutem ei tuae benedictionis infunde: ut, quicumque ex eo sumpserit vel biberit, intercedente dilecto discipulo tuo Joanne Apostolo et Evangelista, singulis morbis et venenis pestiferis effugatis, sanitatem inde corporis et animae consequatur: Qui vivis et regnas in saecula saeculorum.

R/. Amen.

Oremus. **Oratio**

Deus, qui humano generi panem in cibum, et vinum in potum procreasti, ut panis corpus confortet et vinum cor hominis laetificet; quique beato Joanni, praedilecto discipulo tuo, tantam gratiam contulisti, ut non solum haustum veneni illaesus evaderet, sed etiam in tua virtute veneno prostratos a morte resuscitaret: praesta omnibus hoc vinum bibentibus, ut spiritualem laetitiam et vitam consequi mereantur aeternam. Per Dominum. **R/. Amen.**

Et aspergatur aqua benedicta.

**Benedictio auri, thuris et myrrhae
in Festo Epiphaniae**

V/. Adjutorium nostrum in nomine Domini.

R/. Qui fecit caelum et terram.

V/. Dominus vobiscum.

R/. Et cum spiritu tuo.

Oremus.

Oratio

Suscipe, sancte Pater, a me indigno famulo tuo haec munera, qua in honorem nominis tui sancti, et in titulum omnipotentiae tuae majestatis, humiliter tibi offero: sicut suscepisti sacrificium Abel justi, et sicut eadem munera a tribus Magis tibi quondam offerentibus suscepisti.

Exorcizo te, creatura auri, thuris et myrrhae, per Patrem omnipotentem, per Jesum + Christum Filium ejus unigenitum, et per Spiritum + Sanctum Paraclitum: ut a te discedat omnis fraus, dolus et nequitia diaboli, et sis remedium salutare humano generi contra insidias inimici: et quicumque, divino freti auxilio, te in suis loculis, domibus aut circa se habuerint, per virtutem et merita Domini et Salvatoris nostri, ac intercessionem ejus sanctissimae Genitricis et Virginis Mariae, ac eorum, qui hodie similibus muneribus Christum Dominum venerati sunt, omniumque Sanctorum, ab omnibus periculis animae et corporis liberentur, et bonis omnibus perfrui mereantur. **R/. Amen.**

Oremus.

Oratio

Deus invisibilis et interminabilis, pietatem tuam, per sanctum et tremendum Filii tui nomen, suppliciter deprecamur: ut in hanc creaturam auri, thuris, myrrhae bene + dictionem ac operationem tuae virtutis infundas: ut, qui ea penes se habuerint, ab omni aegritudinis et laesionis incursu tuti sint; et omnes morbos corporis et animae effugiant, nullum dominetur eis periculum, et

laeti, ac incolumes tibi in Ecclesia tua deserviant : Qui in Trinitate perfecta vivis et regnas Deus per omnia saecula saeculorum. **R/. Amen.**

Et benedictio Dei omnipotentis, Pa + tris, et Fi + lii, et Spiritus + Sancti, descendat super hanc creaturam auri, thuris et myrrhae, et maneat semper. **R/. Amen.**

Et aspergantur aqua benedicta.

Benedictio cretae in Festo Epiphaniae

V/. Adjutorium nostrum in nomine Domini.

R/. Qui fecit caelum et terram.

V/. Dominus vobiscum.

R/. Et cum spiritu tuo.

Bene + dic, Domine Deus, creaturam istam cretae : ut sit salutaris humano generi; et praesta per invocationem nominis tui sanctissimi, ut, quicumque ex ea sumpserint, vel in ea in domus suae portis scripserint nomina sanctorum tuorum Gasparis, Melchioris et Baltassar, per eorum intercessionem et merita, corporis sanitatem, et animae tutelam percipiant. Per Christum Dominum nostrum. **R/. Amen.**

Et aspergatur aqua benedicta.